

而物議甚疑之不推其人則豈知其情狀乎所當推也○領議政韓效元議今聞臺諫所啓世珩所為至為驚愕所當窮詰但上教某日書冊末端空張略記之欲不忘是亦不無其理更加盤詰若露庇奸之狀究得其情似當史局之事所關至重士大夫連逮亦是重事故欲先究竟世續之事前議已悉左議政金謹思議前日宋世珩之事疑出於無情而慮其杖訊殞命故世續畢推後推之前已議啓今觀兩司所啓世珩奸狀似露不可不窮問不待世續畢推宜速詳詰得情右議政金安老議世珩初雖不記姓名後日詳錄則似乎無情而二十四日之事書之於二十三日其迹似涉於追錄事發之後臺諫所啓甚當若欲彌縫追錄巧掩其術則豈有誤記其日以致顛錯乎此亦可疑且實有曲庇世續之情則豈無平日與世續追從談議之厚乎物論所以疑之者必有所在而世續相與之情亦必有所露處今方窮訊世續以尋其所自姑觀世續之輸供畢得其情而鞫之恐未晚也○夜南方有氣如火○丁酉夜坤方有氣如火○戊戌傳于政院曰宋世珩招辭內世續對策十一月初五六日間令書吏崔淑傳書陪使今誤結于十月二十三日之草冊云世珩二十四日草冊以正書事十一月初五六日前送于